

山

志

# 山志

## 序

莆陽同學

王逸少云中年傷於哀樂正賴絲竹陶寫絲竹不可時得則披覽說部之書以耗壯心遣餘年而已說部惟宋人爲最佳如宋景文筆記洪容齋隨筆葉石林避暑錄話陳臨川捫蝨新語之類皆以敘事兼議論可以醒心目而助談諧非若古之僞書今之文集開卷一尺許便令人惛惛欲睡也華山王山史先生粹天人性命之學紹濂雒關閩之緒其經世大業不朽盛事具有成書間以筆墨餘閒

著成山志六卷大而理學文章細而音韻書畫無不稽察典故辨證精詳使人覽之如食江瑶柱如觀裴將軍劍舞如聽幔亭之樂如游建章千門萬戶如瞻海市雲霞變幻樓臺出沒風水杳冥惟恐其盡也韓昌黎云化世者惟有口傳世者惟有書先生有此書也可以傳矣昔楊用修謫戍滇南無書可采率其曾臆著錄丹鉛誤者十之三四以致陳晦伯正用修胡元瑞又正晦伯究之元瑞錯謬又貽譏於學者簡帙之間紛紛聚訟豈若先生南面百城華陰成市洪纖雅俗典故精詳雖有晦伯

元瑞亦何從而正之哉志中論佛老論祇民論王安石李贄屠隆皆與余合其同鄉諸君宦於越者爲之授梓於其成也故樂而序之如此

凡例

章皇帝御製王承恩碑文又 命金太傅之俊謨  
思陵碑文於先朝 帝皆擡頭乃坊間刻書  
或否非 本朝追崇至意今略依唐人例俱空  
一字

國諱無煩行定字今亦依唐人例但闕一筆月字  
易今從古阝字以示爲卩則予家諱亦倣司馬  
氏以談爲同范氏以泰爲太之義

志中多引他人語其間稱名稱字號稱官稱諡  
不一非同史法無所褒貶唯小人則必稱名

隨筆入載初元因時繼加改增遂至失序又前  
說未備復有討論所賢詳明不厭重複

字畫承譌大失六書之義爲學者咎古文奇字  
又難通俗今特叅酌雖重攷古亦欲宜今不欲  
如趙寒山所作令讀者茫狀也

山志卷之一

屏居山茨讀書之暇偶有所觸隨筆記之雅俗  
並收洪纖無問久而成帙題曰山志蓋竊比容  
齋南邨之義不賢識小則其無倫脊固也朕又  
時時有翫物之懼焉山翁識

明善

予少攻舉子業時有酒色之失尋遭寇亂狂情自  
廢德業靡成年逾四十始知爲學見聖賢言語實  
際要以明善爲宗致知者知此力行者行此盡性  
者盡此踐形者踐此修己者非此無以修己治人

者非此無以治人此之謂善至善也此之謂明明則誠矣身之所在道卽在焉道之所在藝亦在焉下學而上達大行不加窮居不損豁如也書以自喻遂顏於堂

庭訓

先司馬有云先賢積書以遺子孫子孫未必能讀能讀者少矣不能讀者視典籍若弁髦甚有指聖言爲迂闊甘心明悖積金以遺子孫子孫未必能守能守者少矣不能守者視先業若泥沙總繇衣食習爲侈靡自矜豪舉不如積陰德於冥冥之中



以爲子孫長久之計積陰德者亦少矣所以子孫不數年而凍餒離散也陰德云何勤儉以裕己寬厚以蘇人如是而已矣

又云晝夜讀書教訓子弟敦厚倫理勤習稼穡嘗服布衣肅嚴內外飲酒有節對人謙謹出言中倫禁走市囂以上十款不盡簡身之法但以最要者列之能守不失卽此是孝矣

又云今後無論何人接待順理體情勿開弊端勿恃盛氣萬一失簡卽爲引罪務冰釋後已如過在他人聽其自悟此保身家之道也不然卽爲逆子

神必殛之

先司馬爲學宗考亭尤重實踐不事表暴爲德於  
鄉人無間言故文潞公嘗語人云古之聖人吾  
不得而見之矣如王司馬者不謂之今之聖人不  
得與思及此可勝泫然謹識之以示子孫

實訓

漢昭烈帝云勿以善小而不爲勿以惡小而爲之  
明太祖云爲惡或免禍狀理無可爲之惡爲善未  
必福狀理無不可爲之善又云善雖小可以成名  
惡雖小足以亡身 大行帝云無所爲而爲之謂

之天理有所爲而爲之謂之人欲聖賢精義不出  
諸此可不奉爲律令與

甲申秋八月朔書

### 孔孟生卒

孔子生於魯襄公二十二年庚戌十月二十七日  
庚子卒於魯哀公十六年四月十八日乙丑年七  
十三孟子生於周定王三十七年四月二日卒於  
周赧王二十六年正月十五日年八十四今人以  
七十三八十四爲年限謂老者不利或以此也  
按魯襄公二十二年爲周靈王二十一年是年十  
一月無庚子論語註史記世家以爲十一月始誤

孔氏家譜與祖庭記俱以爲十月庚子乃二十七日也五行書論作二月二十三日長曆亦狀林開以爲節過亦不得至二月羅泌謂周之十月卽今之八月遂以八月二十七日爲孔子生日狀周家改月之事吾疑之近世馮應京作月令廣義旣以爲八月二十七日矣又以爲五月初四日則又自相矛盾且五月之說不知何據予謂當以十月二十七日爲是魯哀公十六年爲周敬王四十一年是年四月亦無己丑惟有乙丑論語註史記世家以爲己丑亦誤故祖庭記直作四月乙丑林開以

爲四月戊戌尤無稽又劉氏外紀云孔子年七十四蓋謂孔子生於魯襄公二十一年己酉也今考公羊穀梁傳實作二十一年

祖庭廣記先聖生有異質凡四十九表獨未及舌與鬚髮子思云先君生無鬚眉天下王侯不以此損其敬今世所傳寫鬚髯甚盛蓋吳道元夢中所見者耳

### 孔子子孫

孔子生鯉字伯魚鯉生伋字子思伋生白字子上白生求字子家求生箕字子京箕生穿字子高穿

生武復名斌字子順子順相魏魏王曰吾聞道士  
登華山則長生不歿意亦願之對曰古無是道非  
所願也王曰吾聞信之對曰未審君之所聞親聞  
之於不歿者耶聞之於傳聞者耶君聞之於傳聞  
者妄也若聞之於不歿者今安在在者君學之勿  
疑不在者君勿學無疑所謂理勝於詞與子高之  
論臧三耳同致真聖裔之言也斌生鮒一名甲字  
子魚卽著孔叢子者

孟子父母

孟子之父孟孫激公宜孟孫姓激公字宜名或云

激名公宜字孟子之母乃仇氏也又朱子集註引漢書註云孟子字子車一說字子輿此當從前說而今之稱孟子者唯宋黃仲元嘗曰子車其餘皆曰子輿更不聞有曰子車者何也且子輿曾子字也孟子受業子思之門人不應以曾子之字爲字或曰孟子居貧坎軻故名軻此不稽之言夫名者生而命之矣豈有命名而預定其生平者乎孔叢子註子車一作子居孟子之子名罍按譜卽孟仲子也集註以孟仲子爲孟子從昆弟不知所據孔子年七十三伯魚年五十一子思年六十二伯

魚之歿在前孔子之卒子思實喪主四方士來觀禮焉則其年已長矣今自孔子卒之年計至孟子去齊之年一百六十六年狀則謂孟子親受業於子思者非也通鑑綱目載孟子與子思問荅之言疑皆後人傳會而司馬公不察而錄之朱子仍之耳

### 紫陽

紫陽者新安祝翁題其樓之名也以山在新安居中最高朝陽初升紫光凝聚故也其山之得名亦以此祝翁有女妻朱靖獻公生朱子朱子生於宋



建炎四年庚戌九月十五日時井中有紫氣見後  
朱子作堂室記云紫陽在徽州城南五里先君子  
故家婺源少而遊於郡學因往遊而樂之旣往閩  
中思之獨不置故嘗以紫陽書堂者刺其印章蓋  
其意未嘗一日而忘歸也旣而卒不能歸遺命孤  
熹三十年矣旣不能返其鄉又不能大其門閭以  
奉先祀狀不敢忘先君子之志敬以印章爲刺榜  
其居之廳事故後之學者稱朱子爲紫陽夫子云  
朱子初字元晦以元爲四德之首不敢當更仲晦  
居崇安五夫有紫陽書堂後築室建陽蘆峰之巔

日雲谷自號雲谷老人草堂曰晦菴因自號晦翁  
拜雲臺之命號雲臺真逸晚居考亭作精舍曰滄  
洲號滄洲病客慶元元年韓侂冑誣害趙丞相竄  
置永州中外震駭且矧爲僞學之名以斥善類朱  
子草封事數萬言極陳其姦邪蔽主因明丞相之  
冤諸生力諫遂箠之遇遯之同人朱子默然焚其  
橐遂更號遯翁遯之初六曰遯尾厲勿用有攸往  
陸績曰陰氣已至於二而初在其後故曰遯尾也  
避難當在前而在後故厲往則與災難會故勿用  
有攸往

漢二賢王

河間獻王名德漢景帝子也修學好古被服儒術以金帛招書得書多與漢朝等有傳經之功宜祀孔子廟廡聞昔人曾有言之者禮部議以王故不行

東平王名蒼漢光武子也少好經書雅有智思顯宗甚愛重之嘗問王處家何等最樂王言爲善最樂佗日下詔國中稱其言甚大今之士大夫有好作威於鄉鄰者亦聞此自媿否

語錄

先儒語錄不可不讀者在審問明辨而有不可不改者在用鄉音俗字卽如用這字的字之類非徒不文實不明字義也嗚呼言之不文行之不遠若謂不必乃爾則亦奚貴讀書矣

宋人用底字不知何時竟作的字宰相相沿擬人聖旨天子考文之謂何而絲綸苟簡如斯耶予謂此類皆宜改正無以出於先儒而重自反也

語錄中用方言俚語揆厥所繇實始於禪僧轉相沿習曾不之覺雖大儒不免此苟簡之道不敬之一端也易曰修辭立其誠曰擬之而後言曰其旨

違其辭文何弗省耶

曹靖修

曹月川名端字正夫澠池人博通五經得伊雒之傳永樂初鄉舉授霍州學正在霍十年造士務踐履出其門者皆循循雅飭丁憂起復改蒲州踰年人樂其化時考績京師二州士詣闕爭畱上以霍疏先上仍命之霍又六年卒嘗兩主陝西鄉試天啓二年奉旨賜諡靖修著有孝經直解四書詳說太極圖西銘通書解家規輯略存疑錄夜行燭諸書可稱一代理學之冠特以名位不顯知

之者鮮予謂宜祀瞽宗靖修本楊氏自五世祖繼其舅後因爲曹氏

靖修曰儒書不博觀無以揆其本末原委之真異典不涉獵無以鑒其似是實非之的此學者事也今之高談性命者大率皆飾其空疎不學之過耳或有讀異典而遂輕儒書者自矜其別有悟入其實繇於中之無主故謬悠鄙倍之說得而搖奪之矣

五祀

周官天子之祀曰門曰戶人之所出曰中雷人之

所居曰窰曰井人之所養杜佑曰五祀所以報德也今國家之制立春祀司戶立夏祀司窰季夏土王用事祀中霤立秋祀司門立冬祀司井按禮記月令冬祀行淮南時則訓冬祀井白虎通亦云冬祭井太玄之數冬爲井唐月令冬祀井而不祀行或曰井卽行也蓋行爲井間道古者八家同井繇家而至井井有八道八家所行也祭井卽祭行也程子以行爲宁廊朱子謂是道路之神予疑所謂冬祀之井當是汲水者故曰人之所養或所謂井則道也豈可涸而一之乎今制庶人祭里社鄉厲

併得祭竈而不言戶中雷門井或舉竈以槩之耶  
又按門戶一也雖有一二內外閤闢之分其小者  
耳卽會典中所載祀文門與戶略無異詞世變義  
起似當去其一而更增行焉

周書黃帝作井史黃帝分州置陣象井立法瞽矇  
使舜浚井易重卦已有井名則井之來已古或謂  
伯益作井誤矣

### 父子

父子之稱不但謂所生也父之兄弟兄弟之子皆  
曰父子今世俗稱父之兄曰伯父之弟曰叔兄之



子曰姪皆非也伯叔特以行言姪則婦女之稱耳  
周公作爾雅謂父之兄弟曰從父兄弟之子曰從  
子此本稱也孔子刪詩有宴享父兄之章父卽今  
所謂伯叔故曰速我諸父禮記春秋天子稱諸侯  
亦曰叔父周公謂魯公自稱曰吾成王叔父皆不  
僅言叔也漢疏廣爲太子太傅兄子受爲太子少  
傅廣謂受曰吾聞知足不辱知止不殆宦成名立  
如此不去懼有後悔豈如父子相隨出關歸老故  
鄉以壽命終不亦善乎受叩頭曰從大人議卽上  
疏乞骸骨史稱其父子竝爲師傅朝廷以爲榮是

其自稱於人與人之稱之皆曰父子也晉謝玄破苻堅有驛書至謝安方對客圍碁看書既竟便攝放牀上了無喜色碁如故客問之徐荅曰小兒輩遂已破賊則亦父子之詞今居恆呼對或姑從俗若臨文下筆不可不從古也

伯叔父歿皆當稱府君先儒從之孫稱祖亦曰先君見孔叢子婦稱夫亦曰先君見詩經

### 蔣相國詩

三兄雲隱自京師歸予偶持一扇求書三兄云頃見蔣相國一詩非僧却似老僧寒餌得奇方獨宿

九爛煮黃芽供一醉任憑風雪滿長安遂書之予  
曰是非宰相之言也出自山林輩則可三兄笑曰  
此或其未作宰相時作予曰范文正公做秀才時  
便以天下爲己任其意固已遠矣故天門掉臂王  
元之知丁謂之不忠也三兄爲拊掌蔣公嘗著慤  
書頗畱心當世之務在位亦不久故無所建樹予  
特以其詩太似自了漢耳

### 西洋

昔子斗先生嘗爲予述西洋人言月體不圓如黃  
金堆月中黑者卽其凹處天河如雲氣者皆小星

鼻不止七星蓋以所造遠鏡驗之也大抵西洋之學專奉耶穌於二氏外別立宗旨其與吾儒悖均也朕天文奇器則有獨長

孫督師

癸未秋督師白谷孫公征賊於河南敗績退據潼關約紳士分守城陣冬十月六日公在東城門樓上陪公者舉人孔念心名傑儒初報賊上南城左右驚散念心獨畱再報賊已開南門念心乃舍公趨城下遂被縛念心被縛時別公僅瞬息間耳城上下皆賊如風雨驟至公萬無脫理念心係予至

戚親爲予言如此獨以遇害於亂軍中不得尸故致有紛紛之說耳潼關旣陷高傑率衆逃而西人於火光中見白廣恩引一婦人衣紅短衣披髮乘馬後隨健卒數十人廣恩當先衝敵賊爲辟易亦奪西門去巷戰不止者監軍道喬遷高指揮張爾猷李繼祖皆死之吳司業駿公作綏寇紀略及雁門尚書行以遷高爲名元柱卽其人也

出兵遇雨者不祥兵書謂之沐尸雨歷傳有驗孫督師出兵時霖雨如注巡撫監軍諸公日促之行人馬在泥淖中不堪其苦而曾無有爲言之者此

非獨不知天時抑亦豈所謂人和之道耶

北遊集

僧弘覺著北遊集載

章皇帝出狩昌平回爲言

明之諸陵規模弘敞工費浩繁當日用金非數百萬不可其中龍神結聚堂局周正唯長陵最佳可惜朕去遲了數百年合抱蒼松翠柏砍伐殆盡朕已特下嚴旨仍加護植矣但崇禎帝陵寢湫隘不堪合朕自捐金修葺奈國用匱乏思諭明臣共襄厥事弘覺曰伐陵斷脈古今通弊以元世祖之仁明不能忘情於宋世六陵乃皇上不唯覆

護之反加崇飾焉此至仁至聖之美政真足爲萬世有天下者師法也無幾章皇帝崩其事不果行

一日上閱布水臺文集見其中有薦毅宗烈皇帝疏上曰毅宗莫不是崇禎帝麼弘覺曰朕上曰本朝諡思宗非毅宗也弘覺曰恣僻遠疏虞聞江南諡如此而不知本朝有別諡也上曰此亦何妨朕予聞江南初亦諡思宗後有言思字非美諡者故改之耳

又一日上問弘覺先老和尚與雪嶠大師書法

二老孰優弘覺曰先師學力旣到而天分不如雪  
大師天資極高而學力稍欠故雪師少結構而先  
師之生動互有短長也記得先師嘗語恣曰老僧  
半生務作運箇生硬手腕東塗西抹有甚好字虧  
我膽大耳 上曰此正先老和尚之所以善書也  
揮豪時若不膽大則心手不能相忘到底欠於圓  
活 上復問老和尚楷法曾學甚麼帖來弘覺曰  
道忞初學黃庭不就繼學遺教經後來又臨夫子  
廟堂碑一上繇不能專心致志故無成字在曾往  
往落筆卽點畫走竄也 上曰朕亦臨此三帖怎



麼到得老和尚田地弘覺曰 皇上天縱之聖自  
朕不學而能第恣輩未獲覩龍蛇勢耳 上曰老  
和尚處有大筆與紙麼弘覺曰紙卽 皇上敕恣  
書手卷底尚有十餘張但新制髥豪恐不堪 上  
用 上乃命侍臣研墨卽席濡豪擘窠書一敬字  
復起立連書數幅持一示弘覺曰此幅何如弘覺  
曰此幅最佳乞賜道恣 上連道不堪弘覺就  
上手撒得曰恭謝 天恩 上笑曰朕字何足尚  
崇禎 帝字乃佳耳命侍臣一并將來約有八九  
十幅 上一一親展跡弘覺時覺 上容慘戚默

朕不語弘覺觀畢 上乃涕洟曰如此明君身嬰  
巨禍使人不覺酸楚耳又言近修明史朕敕羣工  
不得妄議崇禎 帝又命閣臣金之俊謨碑文一  
通暨於隧道使天下後世知明代亡國罪繇臣工  
而崇禎 帝非失道之君也弘覺曰 先帝何修  
得我 皇爲異世知己哉予嘗至昌平守陵人爲  
言 章皇帝哭 烈皇帝狀甚悉今觀此集所載  
益不啻三致意焉讀 御製太監王承恩碑文較  
之俊所謨更痛切矣

王右軍

右軍告墓文今之所傳卽其槁本不具年月朔日  
其真本云惟永和十年三月癸卯朔九日辛亥而  
書亦是真小文開元初瓦官寺修講堂匠人於鴟  
尾內竹筒中得之與一沙門至八年縣丞李延業  
得之上岐王以獻帝便畱不出按永和十年正月  
殷淵源免爲庶人以連年北伐師徒屢敗故也先  
八年春淵源舉師北伐右軍以書止之不從旣敗  
秋復謀再舉右軍又遺書有云今亟修德補闕廣  
延羣賢與之分任尚未知獲濟所期若猶以前事  
爲未工故復求之於分外宇宙雖廣將何所容也

又不從九年春乃修禊於蘭亭時也至此作告墓文蓋亦有感於淵源之所爲矣

嘗有人言雲南在昔文廟中所祀者爲王右軍非孔子也心竊疑焉近見天台馮氏所作滇攷乃真有之滇攷曰至元十五年除張立道中慶路總管佩虎符雲南未知尊孔子祀王逸少爲先師立道言於賽典赤始建孔子廟置學舍擇蜀士之賢者爲弟子師歲時率諸生行釋菜禮繇是人習禮讓矣朕不言其祀逸少者何故始於何時主之者何人也立道陳畱人卒於官與賽典赤竝祠鄩闡城

至今血食不絕賽典赤名瞻思丁一名烏馬兒同  
同人其國稱賽典赤猶言貴族也宿衛元世祖以  
賽典赤呼之而不名

### 康對山

康對山與李空同素善李爲韓忠定草疏劉瑾切  
齒必欲置之死既下獄獄吏侵之李乞筆研獄吏  
曰囚安得作書侵益急李乃裂帛齧指血與康書  
曰對山救我惟對山能救我其內弟左國玉亦上  
書與康勉以大義先是瑾聞康名甚慕又自以同  
鄉欲借之彈壓百僚屢致不至康既得書卽倉皇

走見瑾時六卿見瑾皆長跽不爲動康至瑾大喜  
倒屣出迎曰何處好風吹先生至乎昔高力士折  
節青蓮今得從先生遊雖執鞭納履所欣慕焉康  
卽據上坐顧盼自若瑾喜慰甚康因曰如海百輩  
何足比數李夢陽海內才人而明公不恤今下獄  
旦暮且歿歿天下後世自以明公不愛才也如海  
百輩何足比數乎遂絮泣曰可惜可惜瑾爲動色  
遽出李獄後瑾敗康坐罷去益縱情聲妓恣遊山  
水李議論稍過嚴刺馬中錫作中山狼傳以詆之  
王羨陂遂填詞爲中山狼院本狀予又聞李下獄

時求康居間實何大復畫策何亦自上書李文正  
力救而康落籍或謂文正主之蓋文正方秉天下  
文柄嘉與後進一時名流皆出其門獨康李輩崛  
起自樹壁壘舊例翰林官丁憂其墓文率請之內  
閣諸公康丁憂聞喪卽行求李空同作墓碑王漢  
陂段德光作墓誌與傳故文正大爲不平王與康  
爲姻家其遊春院本中所謂李林甫正指文正也

### 康山

辛卯春予寓惟揚姚永言太史嘗招飲康山草堂  
詢其錫名之故云康對山昔微身於此日事醅酌

每出於市上唱琵琶詞人不識其所以一直指過  
於輿中識之翼日相訪果狀再跡之已行矣康山  
得名以此狀此事不見於對山傳中草堂扁則董  
文敏書也

### 詩文

昔人云文能宗經體有六義一則情淡而不詭二  
則風清而不雜三則事信而不誕四則義直而不  
回五則體約而不蕪六則文麗而不淫如此爲文  
其有不合道者鮮矣

古詩舊標十九首不知作者或云枚叔文選註以



游戲宛與雒與驅車上東門詞兼東都非盡是叔  
又以東城高且長與燕趙多佳人明是二首不應  
合而爲一其言最當今正當稱二十首耳朕二十  
首自是一人作如云非盡是叔是以爲兩人則又  
未必朕也

擬古詩始於陸士衡孫月峰曰句倣字效如臨帖  
朕朕又戒太似所以用心最苦大抵貴得其神若  
擬古詩則詩道自進此學詩者所當知也

謝康樂擬魏太子鄴中集詩八首郭美命以爲巧  
摸極擬各類其人江文通有雜體詩三十首皆數

其文體嚴滄浪云擬古惟文通最長擬之皆似獨  
擬李都尉一首不似西漢耳

夢溪筆談載司馬相如敘上林諸水曰丹水紫淵  
灞滻涇渭鄠鎬潯潏八川分流相背而異態東注  
太湖舊註太湖所謂震澤按八水皆入大河如何  
得東注震澤又白樂天長恨歌云峨嵋山下少人  
行旌旗無光日色薄峨嵋在嘉州與幸蜀路全無  
交涉杜甫武侯廟柏詩云霜皮溜雨四十圍黛色  
參天二千尺四十圍乃是徑七尺無乃太細而長  
乎防風氏身廣九畝長三丈姬室畝廣六尺九畝

乃五丈四尺如此防風之身乃一餅餽耳此論雖  
似過刺其實亦文之病也

王勉夫獨謂不宜後  
泥笑其用九章筆法

昔與吾友會於青門談詩曰杜陵五言律當以能  
畫一首壓卷後數年又會於青門談詩曰杜陵五  
言律當以送翰林張司馬南海勒碑一首壓卷予  
謂能畫一首頗涉議論已開宋人一派且頸聯失  
之率結語尤不成文議論雖好不足法也若送翰  
林張司馬南海勒碑一首則異是後之所言應勝  
於昔大約詩固以自狀爲貴亦須句字琢練方堪  
吟咏又古人爲詩興會所至各有佳處必於全集

中求一首壓卷亦不必矣

心史

鄭所南思肖著心史以鐵函藏之井中其元本在  
陸孝廉履長處予曾親見之所言皆宋末元初事  
詩文有朱筆圈點崇禎己卯已有刺本行世矣所  
南善寫蘭獨不寫培塿與倪雲林不寫人物其意  
略同別號三外老夫又嘗作太極鍊法蓋元時高  
士多寓跡二氏如黃子久吳仲圭皆是也所南父  
名起字叔起號菊山此人所鮮知者故表山之

趙文敏書畫

世以趙承旨書爲集大成蓋其用工勤而且久無一筆不有所自來但比之畫道卽居神品非逸品也若其畫則勝於書于密菴云其生平得意之筆曰鵲華秋色今在山東張氏家欣予舊聞在松江董宗伯處宗伯所云兼右丞北苑二家畫法有唐人之致去其纖有北宋之雄去其獷者也不知何以流傳於彼每以不獲寓目爲恨予嘗得小畫一幀有項墨林收藏印記定爲承旨筆偶出以示密菴密菴曰此承旨真蹟也君欲見鵲華秋色卽此是矣但大小不同耳密菴溪心內典幼從張鶴澗

學畫臨倣古人皆得其要故鑒賞極精

### 陸包山

陸包山行誼甚高王弇州爲作傳極稱之予有其  
山水大幅一軸郭宛委松談閣所藏也嘗於池陽  
來氏處見一冊尤爲細潤似亦脫去蹊徑矣戴楓  
仲有寫生二軸一泥融飛燕子一沙暖睡鴛鴦氣  
韻超逸出入宋元大抵包山畫遜沈文而其著色  
有獨得此可爲知者道耳

### 董文敏

董文敏有云詩文書畫少而工老而淡淡勝工不

工亦何能淡此至言也朕吾論文敏畫第一制義次之書又次之其所爲詩古文辭則下駟耳

### 王宗伯書

宗伯於書道天分旣優用工又博合者直可抗跡顏柳晚年爲人略無行簡書亦漸入惡趣奉命來祭華嶽爲賊所困畱滯華下寫字頗多益縱弛失晉人古雅遺則乃知書品與人品相爲表裏不可掩也三百年來書當以東吳生爲最法度不乏而神采秀逸所謂自性情中流出愈看愈佳耳宗伯則久之生厭倘不謂朕請爲布琰三日

仇紫巘

仇紫巘名時古字叔尚曲沃進士爲松江太守與董宗伯思白陳徵君仲醇善有富室殺人法當死求宗伯居間太守故不從曲令重贖乃釋之自是往來益密宗伯每一至署太守輒出素綾或紙屬書無不應者所得宗伯書不下數百幅太守歿後爲其親友索取遂至散佚予猶及見者止行書大字尚四十餘幅間有無印章者以在署時未攜故耳

仇氏書畫之富甲於山右其所藏蓋千有餘種在



松江時凡有所得輒求董宗伯陳徵君爲鑒定故往往有二公題字予及見者三百五十六種狀真贋參半可稱好事家

仇氏藏畫最著名者李成寒林大軸馬遠瀟湘八景手卷俱賈平章物也李畫有賈平章題云營丘李夫子天下山水師放筆寫寒林千金難易之其邊闌有董宗伯題云李營丘樹米元章時止見二本此圖爲賈秋壑所藏西蜀陳文憲公得之求予作四代誥命以作潤筆丙申四月事也丁卯十月重識馬畫董宗伯題其首云馬遠瀟湘圖四段作

八景煙雲縹緲之致具見筆端令人不動步而作  
楚遊真南宋名手也卷中題咏皆勝國及國初賞  
鑒之家可稱墨寶上有機暇清賞緝熙殿寶及秋  
壑印章所謂題咏者朱德潤李構張遜魯沙鄭元  
祐李祁張舜咨倪中巖樸呂宗聖呂憲也

予戊申秋在曲沃於仇氏處亦購得數種中有陸  
文裕公真跡一卷董宗伯題云文裕公詩帖嘗一  
幅至作數幅擇其自謂得意者方存之餘皆付丙  
丁恐傳世有示朴之誚耳前輩用意矜重乃爾因  
文祝同時頗爲吳中所掩若作公論實在待諒京

光之上陳徵君題云儼山先生初繇吳興晚入北海之室嘗曰吾與子昂同學北海不從趙入也觀此卷信狀真吾松翰墨導師耳文裕君子也予之重此卷又不獨以詩與字矣

朱竹

孫雪居嘗寫朱竹輒自題云管夫人喜寫朱竹楊廉夫贈以歌行載集中或云是壽亭侯始予數見之狀漢壽地名亭侯爵也當云漢壽亭侯雪居乃不辨此耶

陳祺公

陳祺公與予以翰墨相來往幾四載矣而實未識面戊申秋予至保定始獲晤對朝夕相聚因并識其兄大來祺公居官有才有守而豁達大度不可一世政事之暇博覽羣籍尤好交遊慷慨狀諸有古人之風其居家則內外大小事皆大來主之祺公事之唯謹恂恂若孺子夫身列外臺位非不高年逾不惑齒非不長而能守禮若此可謂賢矣予每察其言動退而思之益覺其尊世或有甫登科第而慢骨肉以自驕者亦只見其隘也已

宋陳公省華三子皆已貴爲宰相及節度使公尚

無恙每客至三子侍立左右客不安求去公笑曰  
此兒子輩耳故當時人咸榮之而以公教子爲可  
法富鄭公爲相雖微官布衣謁見皆與之抗禮引  
坐語從容送之及門視其上馬乃還此皆度越今  
人遠矣

### 孫少宰

京師收藏之富無有過於孫少宰退谷者蓋大內  
之物經亂後皆散逸民間退谷家京師又善鑒故  
奇蹟祕翫咸歸焉予每詣之退谷必出示數物畱  
坐竟日肴蔬不過五簋酒不過三四巡所用皆前

山志卷一  
代器頗有古人真率之風凡予所談論退谷輒喜以爲與已合唯於王文成有已甚之詞予不狀之時方構秋水軒以著述自娛其扁聯皆屬予書年已七十有八手不釋卷窮經博古老而彌篤近今以來所未有也

### 定武蘭亭

予得定武蘭亭五字未損本蓋秦府物亂後落在民間者舊爲宋仲溫所藏有米元暉諸君跋仲溫錄趙魏公十三跋於後而又自爲之跋者九書法精善無一懈筆沮砉文亟賞之每過予觀之竟日

不倦近劉公勇著識小錄中有云王山史亦有五  
字未損本蘭亭宋搨豫章本也有米元暉跋與宋  
仲溫跋若出一手爲蛇足耳茗文大不狀之予嘗  
馳簡公勇云米元暉跋弟固疑其贗狀與宋仲溫  
跋用筆迥異足下謂如出一手何也因讀佳著著  
意尋求欲摘其一筆稍似亦不可得今遂望足下  
刪改此橐不狀失言矣

善畫人

古今善畫人別號可稱如顧癡米顛范寬倪迂之  
類蓋其性情有別致出於世網之外故足尚耳

談勢利握蹠問米鹽之徒筆墨雖工終不能超逸絕羣也

### 上林圖

仇十洲上林圖一卷臨趙千里筆也予在京兆曾見之工細之極非周歲之力不能也汧文石以善價得之一老兵今於燕市更見二卷工細相等筆力稍遜神采遂異蓋贗作耳其一卷又增寫伯駒二字爲款劉太史以五十金購去公勇嘗過予稱之予笑曰十洲卷可彷彿千里千里卷乃不及十洲公勇問故汪卷適在予所因出視之公勇爲爽



狀

自勵

予自三兄逝後無日不愴於中且自警自懼故  
於庚戌元旦謹告先靈凡一切逾分違理事必不  
敢爲所以養身非獨自勵亦望我子弟共識此意  
也

予昔日好聲伎三兄嘗以爲戒今每憶及不禁泣  
數行下悔過之誠有如皦日不獨如吾家右軍所  
云恐兒輩覺損欣樂之趣也

瘞骨

田生生言狗見狗骨必銜之於曠地埋之蓋物之恤其類也如此狀則人有見人之骨而不爲之瘞者愧於狗矣

### 殺生

天地生人卽生爲人之食者如五穀蔬果之類不一而足食肉非天地之心也弱肉強食殺機日熾聖人知其不可止也制爲之禮示之以節使其非祭祀燕享不無故輒殺故殺生者聖人之不得已也若以殺生爲理之當欣此必不敢信者試思物之就殺其哀情痛楚之狀有不心惻者乎在我不

過縱一時口腹之欲耳而令彼之性命以終此何理哉

虎狼人皆惡之謂是惡獸天地生彼以肉爲食無有他食人乃惡之人既有穀食又必食肉且無所不食百計以取之豈得非惡乎而恬不爲怪蔽於習也蘇文忠公自出獄後但食已死之物絕不宰殺一生自謂非有所求因已親經患難無異鷄鴨之在庖廚不復以口腹之故致使有生之類受無量怖苦耳今未能斷肉當守文忠公此戒可也

戒屠

予同姓中有父子爲屠者後其子二人皆以小事  
自刎頃予從子爲新城令予至署日適值里民狀  
白屠戶王天勉子伸自刎事天勉有三子長者曩  
已自刎歿第三子方幼忽投入沸湯醢中脫皮而  
歿至是伸又自刎歿天下生計儘多豈必宰殺始  
有利益耳目見聞不曾有屠戶至殷富長久者亦  
可鑒也孟子曰術不可不慎矢匠尚不可爲况屠  
乎予同姓中尚有爲屠者是日寄書勸戒附贈白  
金四兩助令改業

九經字數

周易二萬四千二百七字尚書二萬五千七百字  
毛詩三萬九千一百二十四字禮記九萬九千二  
十字周禮四萬五千八百六字春秋左傳一十九  
萬六千八百四十五字孝經一千九百三字論語  
一萬一千七百五字孟子三萬四千六百八十五  
字共計之不滿五十萬字歐陽文忠公嘗以此勸  
人讀予謂每日讀一千字不及二年可周或有人  
事之擾卽以三年爲期亦不爲勞而從事者鮮何  
也偶一思及不勝警愧漢人云三十而五經立蓋  
古人讀書皆有定限今人直是悠忽度日宜乎學

之不如古也

禮佛老

邵子堯夫見佛老像則拜程子伊川遊僧舍一後  
生置坐背佛像伊川令列坐門人問曰先生平日  
闢佛老今何敬也伊川曰平日所闢者道也今日  
所敬者人也且佛亦人耳想在當時亦賢於衆人  
者故闢其道而敬其人朱子嘗記尹和靖五事有  
云先生在從班時朝士迎天竺觀音於郊外先生  
與往有問何以迎觀音也先生曰衆人皆迎某安  
敢違衆又問狀則拜乎曰固將拜也問者曰不得

已而拜之與揖誠拜也曰彼亦賢者也見賢斯誠  
敬已拜之矣予次子知讀書不喜二氏每遇寺觀  
中像挺然而過卽一長揖不肖也予嘗舉此訓之  
今至寺觀乃恂恂肫致禮矣

### 朱子讀二氏書

朱子讀釋氏書作詩有身心晏如之嘆而尤時時  
有取於道家之言如陰符經有註參同契註雖不  
成於朱子而其說皆本之朱子蓋其學通徹上下  
包括巨細如海涵地負無所不有故於二氏之言  
不盡棄絕而要其所守一歸於正學者必如朱子

之守方可以讀二氏之書胡敬齋謂調息箴可以不作乃以是爲朱子病耶

人身八卦

人首圓象乾天足方象坤地身體象艮山津液象兌澤聲音象震雷呼吸象巽風血榮象坎水炁衛象離火是八卦皆備於我也耳目鼻皆雙竅口小便大便皆單竅故鼻下口上謂之人中其卦則泰也素問云天不足西北以北方陰也人右耳目不如左明地不滿東南以東方陽也人左手足不如右強氣屬陽形屬陰陽左陰右陽清陰濁陽虛陰



實也道家謂人一身皆屬陰唯先天一氣是陽此氣非呼吸吹噓之氣人在胎中先受此氣九竅四肢次第而成人象具足此氣正在空虛之間若能御氣則鼻不失息食生吐死可以長生鼻納氣爲生口吐氣爲死也朱子不非調息之說蓋有以也

### 書式

洪武三年詔中書省臣曰今人於書劄多稱頓首再拜百拜皆非實其定爲儀式令人遵守又小民不知避忌往往取先聖先賢漢唐國寶等字以爲名字宜禁革之於是禮部定議凡致書於尊者稱

端肅奉書荅劄稱端肅奉復致平已者奉書奉復  
上之與下稱書寄書荅卑幼與尊長則云家書敬  
復尊長與卑幼則云書付某人其名字有天國君  
臣聖神堯舜禹湯文武周漢晉唐等國號悉令更  
之萬曆二十七年禮部題奉 聖旨民間止用折  
簡不許用全簡此亦省財之一端所以教儉也後  
皆不見遵行習俗相沿賢者不免矣

今人往來用副啓別具名簡蓋起於有所私避之  
耳旣用封又用護封俱屬繁費非古省之可也

山志卷之一

山志卷之二

人心道心

虞廷言心不言性是從其動處言之也蓋人心一動有善有惡是聖狂之分也豈不危乎人心一動知善知惡天目不昧卽爲道心所謂幾也豈不微乎惟精者察其危也惟一者養其微也精一者工夫也中者本體也精一是從本體用工夫也至允執厥中是從工夫識本體也先儒以人心直作人欲則於危字不關切且明是心字如何強作欲字耶

精有二義別其端不雜也充其類弗蔽也故曰辨之明一有二義志之專勿二三也行之力無作輟也故曰守之篤

馮恭定

馮恭定之學恪守程朱之訓可謂純而正矣先司馬嘗遊其門稱其口無擇言身無擇行此吾輩之所當奉爲神明蓍蔡者也讀其集但觀其語錄足矣其詩文固可略在公元不欲以詩文自見也

公嘗云陽明先生致局知三字洩千載聖學之祕有功於吾道甚大而先生又曰無善無惡心之體

有善有惡意之動知善知惡是良知爲善去惡是格物夫有善有惡二句與致良知三字互相發明最爲的確痛快爲善去惡一句雖非大學本旨朕亦不至誤人惟無善無惡一句關係學脈不小此不可不辨何也心一耳自其發動處謂之意自其靈明處謂之知旣知善知惡是良知可見有善無惡是心之體今日無善無惡心之體亦可曰無良知不良知之體耶近日學者信致良知之說者併信無善無惡之說固不是非無善無惡之說者併非致良知之說尤不是或曰果如致良知之說朕

則諸儒所稱或主靜或居敬或窮理或靜坐或體  
認天理或看喜怒哀樂未發氣象彼皆非歟曰不  
然。居知是本體居敬窮理諸說皆是致。居知工夫  
致之云者非虛無寂滅如二氏之說也。致乎致乎  
豈易言哉。公之論陽明可謂公而平矣。獨於爲善  
去惡一句猶有恕詞。予謂此句正不可不辨。蓋學  
者用功分途。正學異端分途皆在於此。豈可謂非  
大學本旨而猶不至誤人耶。

或問近日學者亦知無善無惡之說之誤。又講有  
善之善有無善之善。若謂善之善對惡而言也。無

善之善指繼善之初不對惡而言也何如公曰吾  
儒之旨只在善之一字佛氏之旨卻在無善二字  
近日學者既惑於佛氏無善之說而又不肯抹殺  
吾儒善字於是又有無善之善之說耳又有一譬  
云山下出泉本源原清漸流漸遠有清有濁謂有  
濁而清名始立則可謂流之清對濁而言則可謂  
水之源無清無濁則不可謂流之清爲清之清源  
之清爲無清之清則不可知此則本體無善無惡  
之說有善之善有無善之善之說是非不待辨而  
決矣此皆不易之論也

公曰此謂知本此謂知之至也一節與上聽訟節雖分兩節原是一章非衍文亦非別有關文也右傳之四章釋本末八字當序在此謂知本節之後予謂以此謂知本接此謂知本連說兩句似禪僧機鋒語聖賢斷無此文法又云一本大學都是釋格物不必另補格物傳傳止談九章狀格物傳固可以不補而今觀所補之傳語意俱到明晰痛切有功於聖人有益於來學遂覺其有必不可少者朱子第一作也聞當時有人問何不卽用大學文法朱子曰亦嘗擬之終不似故不用此朱子識高



處夫文以明道道既明不在文之似與不似也文中子於聖賢之學實有心解而以模範論語遺議後世又不可爲鑒耶

或曰書云人心惟危道心惟微解者多指人心爲人欲道心爲天理此言非是心一也人安有二心自人而言則曰惟危自道而言則曰惟微罔念作狂克念作聖非危乎無聲無臭無形無體非微乎此言極可思而公非之斥爲異學誤人乃公又有云使人有兩箇心一箇是人心一箇是道心有何難精惟其只是一箇心所以難於辨別難於分析

卽公此言觀之與或所言正可相發明而公斥之豈以其出於陸子而遂槩棄之耶

道心非人不麗人心非道不宰不必屏去人心而別覓道心也舉吾之人心一稟於道卽道心矣故以喜怒哀樂視聽言動爲人心以中節合禮爲道心公駁之云以中節合禮爲道心不差而以喜怒哀樂視聽言動爲人心不知喜怒哀樂視聽言動可以屏而去之乎以必不能屏而去之者爲人心是明白左袒人心回護人心也按此則人心二字真不可直解作人欲矣何也正以其不能屏而去

之也而公必謂人心屏而去之猶恐不盡至云道  
心爲善爲君子人心爲惡爲小人竊恐其說之果  
而流於偏也

解者不以人心爲人欲公謂其回護人心或有問  
虞廷說人心道心而上蔡謂心本一支離而去者  
乃意耳何也公曰心本一自念起而後有人與道  
之分故曰欲正其心者先誠其意上蔡之言從大  
學來蓋心爲意之主宰意爲心之發動本只是一  
箇心只因一念發動處遂名爲意耳上蔡之所謂  
心與大學之所謂心對意而言也虞廷之所謂心

兼意而言雖不言意而意與知自在其中也予謂以公此言觀之則人心不可直解作人欲益明矣既云意與知在其中而以意與知卽謂之欲謂之惡謂之小人可乎恐與性善之旨又難通矣且如此說則上蔡之言亦是回護人心公援大學之言卻又是回護上蔡也

朱子云人心但以形氣所感者而言耳具形氣謂之人合義理謂之道有知覺謂之心又云飢欲食渴欲飲者人心也得飲食之正者道心也須是一心只在道上少間那人心自降伏得不見了人心

與道心爲一恰似無了那人心相似只是要得道  
心純一道心都發見在那人心上觀此則人心不  
可直指爲惡爲小人益明卽中庸序謂之私者亦  
只是就形氣說故曰使道心嘗爲之主而人心每  
聽命焉若是惡是小人則當斷滅之矣豈猶使之  
聽命乎蔡氏尚書註亦本此爲說今特不以人心  
作人欲耳而心中理欲之分自在於此於聖賢立教  
爲學之旨果何所悖而云異學誤人耶按以人心  
爲人欲道心爲天理其說實始於程子蓋從一念  
起處別善惡之途故如此分疏未可執之以爲人

心定解也

善利圖

馮恭定作善利圖其教人之方最爲警切詩云聖狂分足處善念是吾真若要中間立終爲蹠路人謂中間無路予謂竝無中間譬之植表於此不正卽邪非有不正不邪之影在其中間故嘗僭擬一圖善路正出利路邪出不作兩對也

好名

聖人不好名狀非辭名也故曰必得其名又曰君子疾沒世而名不稱焉諸言名者不一三代而後

人能斤斤好名不亦君子乎乃小人譏君子多以  
好名二字范忠宣曰人若避好名之嫌則無爲善  
之路矣

### 楊墨

楊墨惡當世士習乃自拔於流俗之中思有以易  
天下亦一時之傑也特其學術之偏矯枉太過將  
復有害於世道人心孟子所憂者遠故斥其無父  
無君爲禽獸無非淺惡痛絕之意程子謂佛氏之  
書當如淫聲美色以遠之亦如此大抵皆甚詞也  
佛氏所不論今日如有真能爲楊墨之學者得不

以爲出羣之介士而邁俗之通才乎故學者尤當知世變

程子曰墨子愛其兄之子猶隣之子墨子書中未嘗有如此等言但孟子拔本塞源知其流必至於  
是故直之也觀此可知予言非謬

### 邵康節詩

宋儒深於易者邵康節耳其擊壤集是以詩作語錄前無古後無今矣宜朱子之稱爲天挺人豪也玉臺翁嘗有絕句云子美詩之聖堯夫更別傳後來操翰者二妙罕能兼此意又非深於詩者不知



也

日月星辰水火土石

太剛爲火火之在天則爲日太柔爲水水之在天則爲月少剛爲石石之在天則爲星少柔爲土土之在天則爲辰故陽燧取於日而得火火與日一體也方諸取於月而得水水與月一體也星隕而爲石星與石一體也自日月星之外皆辰也自水火石之外皆土也是辰與土一體也天只有日月星辰四者地只有水火土石四者康節之說如此於五行之義有異已見於道藏矣

陰陽剛柔仁義

予聞諸朱子曰陽主進而陰主退陽主息而陰主消進而息者其氣強退而消者其氣弱此陰陽之所以爲剛柔也陽剛溫厚居東南主春夏而以作長爲事陰柔嚴凝居西北主秋冬而以斂藏爲事作長爲生斂藏爲殺此剛柔之所以爲仁義也以此觀之則陰陽剛柔仁義之位豈不曉然而彼揚子雲之所謂於仁也柔於義也剛者乃自其用處之末流言蓋亦所謂陽中之陰陰中之陽固不妨自爲一義但不可以此而論之耳近有一士疑此

說予爲之指析數端終不免爲袁機仲一流也

### 順逆虛實

凡爲學之道皆逆功也逆以用之順以成之自朕之道也順者其體逆者其用也體用一原順逆一理知逆之爲順者其知道乎

天下之道順逆虛實而已不逆則其順無成也故生知安行皆是逆力困知勉行莫非順事不實則虛不得而用也故多聞多見所以用虛不覩不聞正因體實君子爲學唯爲其逆且實者而已

天地之理本實朕其用在虛老子所謂埏埴以爲

器當其无有器之用參同契所謂以无制有器用者空是也

諱字

唐人諱虎以虎林爲武林諱曷以丙丁爲景丁諱淵以殷淵源爲浚源宋人諱恒以田恒爲田嘗諱桓以齊桓公爲威公諱貞以王文貞改爲文正夫尊者之名禮所宜諱但缺一筆不寫完如唐刺孝經聖教碑中世民治等字可也先朝太祖之名初不諱而於所逮事者則諱朕皆別易一字往往失其文義但旣定爲令自不敢不從崇禎三年禮

部頒行諱 太祖名下一字竟不見遵行何也

歐陽文忠

嘉靖時議以歐陽修從祀孔子廟廡衆論靡定  
世宗一日諭大學士楊一清曰朕閱書武成篇有  
引用歐陽修之語豈得謂修於六經無羽翼聖門  
無功乎一清對曰歐陽修之在宋以通今學古爲  
高以濟時行道爲賢以犯顏納諫爲忠蘇軾稱其  
論大道似韓愈論事似陸贄敘事似司馬遷誠有  
不可誣至知貢舉一變文體闢異端則有本論一  
篇是亦有功於聖門至於濮議諸篇得先王禮經

遺意發明倫理委曲詳盡但孔廟從祀取其著書  
立言輔翼六經之功其餘文章勲業皆非所論也  
洙泗及門之徒親受聖教故雖事無可考者亦不  
敢遺漢唐專門之師傳授聖經故雖學行有疵者  
亦不敢略朱熹語孟集註所取如尹焞游酢謝良  
佐范祖禹胡寅各有註釋者皆不得與至如熹之  
師李延平同時豫章羅氏皆號真儒亦不得與修  
之論說見於武成蓋僅有者耳其從祀一節未敢  
輕議一清語旣周詳意復婉切渙得告君之體狀  
修卒得從祀予謂修本賢者於從祀奚歎但當時

建議諸臣希望風旨意別有在元非爲修修如有知應反爲恥耳

### 洪忠宣祭文

洪忠宣以忤秦檜安置英州後徙袁州卒於南雍州道出南安張子韶致祭其文曰維某年月日具官某謹以清酌之奠昭告於某官之靈嗚呼哀哉伏惟尚饗其哀憤憂鬱之意不能盡言遂置之不言迄今猶可想見忠宣卒後一日檜亦歿子韶祭時猶未及知也

### 五更

禮文王世子三老五更註年老更事者也漢書註  
五更知五行者列子禾生伯子出行經垌外宿於  
田更亦如此訓張湛註更當作叟楊用修非之按  
蔡中郎集五更作五叟謂叟長老之稱其字與更  
相似書者轉誤嫂字瘦字從叟今或皆以爲更矣  
司馬孚武攸緒

司馬氏纂魏而同姓有孚武氏亂唐而同姓有攸  
緒所謂鳳凰不與鴟梟爲羣麒麟不與麋鹿爲伍  
者也狀孚尚受爵而攸緒辭位遠避又加於孚一  
等矣逆賊李自成之妻王氏僞稱皇后其弟僞稱



皇親有一舉人自認爲同宗以之誇耀里門人之  
賢不肖相去奚啻千里王氏本南山一淫行婦人  
也旣稱皇后使人迎其母其母年已老見素所善  
羅生遙呼曰羅大哥天乃殺我至此乎言訖涕下  
此嫗勝於舉人多矣予見羅生於李千之處親爲  
予言如此千之曰羅生昔私暱王氏最厚王氏被  
賊擄不知所之羅生憐其母弟嘗周卹之故相善  
其弟旣稱皇親自成北行屬之追比蒲州鄉官餉  
銀暴惡不異於賊一日往解州謁關壯繆廟長揖  
不拜忽吐血仆地而歿今二州人皆能言之亦可

異也

錦瑟

周禮樂器圖雅瑟二十三絃頌瑟二十五絃飾以寶玉者曰寶瑟繪文如錦者曰錦瑟李義山有錦瑟詩黃山谷讀之不曉其意後以問蘇東坡東坡曰此出古今樂志其聲配適怨清和一篇之中曲盡其意劉貢父詩話謂錦瑟當時貴人愛姬之名蓋非無所據唐詩紀事謂錦瑟卽令狐楚青衣都玄敬非之狀詳觀詩意自是借名賦事必有所指非徒作也獨五十絃之說註者紛紛或云當作十

五或云當作二十五按漢書郊祀志有五十絃之  
文東坡亦云其絃五十其柱如之要亦有所本今  
其器不傳

### 丘文莊

丘文莊名臣也其所謨大學衍義補爲先朝第一  
著作人謂其中絕不指斥內臣以將進呈 御覽  
欲得近侍之歡耳予按內臣預政之禍已見於真  
氏之書公於正百官條中丁寧及之固善卽不狀  
亦不害其爲全書也至陰主劉文泰詰奏王端毅  
又令人作傳汗之與閣老餅事果有之則失大臣

之義前輩多謂公心術不可知又謂不脫海蠻習氣而同官劉吉作一對書於門曰貌如盧杞心尤險學比荆公性更偏時論頗狀之狀言出於吉不足憑也雙槐歲鈔極稱公言行爲不可及謂文泰事公實不知但公嘗言范文正生事岳武穆未必能恢復秦檜於宋有再造之功皆極詭異則紛紛之口得非有以自致之與

武穆之事古今有心者之所共悲也當時旣殺之以莫須有而後世又欲掩之以未必能何君子之不幸乎援筆書此幾欲隕涕

# 疊字

今人爲書於字之疊者下輒作二點昔有人以問李西涯西涯謂非二點乃古上字也朕後漢鄧騭傳有元二之災章懷註云元二卽元元也古書字當再讀者卽於上字之下爲小二字言此字當兩度言之西涯未察也鍾繇帖中有宜字下作點釋者謂非疊宜字乃疊宜字下且字耳如大夫子孫等字古俱作點予謂以點疊字此苟簡之道朕可施之於草不可施之於楷至疊字之半則其謬已甚雖古有之不可從也

鄧騭傳元二之災上有遭字下有人民饑荒字洪容齋謂漢碑楊孟文石門頌云中遭元二西戶殘害孔耽碑云遭元二坎圻人民相食趙氏金石跋云若讀元元不是文理又引王充論衡有云今上嗣位元二之間嘉德布流謂建初元年二年也永初元年二年郡國地震大水鄧騭以二年十一月拜大將軍是所謂元二者謂永初元年二年也宋王楙又引陳忠傳有云頻遭元二之厄正與騭同時狀則騭傳當作兩年解而章懷兩度之註亦自有理當別存其義者也

## 田孝子

富平田上則爲李自成所殺蓋代父歿難孝子也  
非今世廬墓刲股者可比予嘗言之郭九芝明府  
爲建祠與唐梁孝子並祀以旌之不知今竟能成  
否予不識上則其詩文亦不多見李天生偶述其  
秋日荆園懷季父驃騎公一詩云釀酒新成稻子  
香提兵江漢爲勤王將軍鐵甲秋風裏間殺東籬  
菊正黃特錄以識之

上則之父爲參藩其哭上則有一聯曰爾父爲臣  
不能盡忠保生惜命殊覺慚天愧地吾兒爲子乃

能盡孝殺身成仁應知垂後傳今狀參藩以上則代歿得不辱於賊吾無譏焉而上則之孝大矣

### 五音

人之聲繇心生其出於中也有漸聲始出於喉直上出爲宮再出到嚶聲上騰爲商又再出到舌中聲平出爲角又再出到齒聲斜降出爲徵又降出到脣爲羽喉嚶舌齒脣乃人元氣出隨所到之處而得宮商角徵羽之聲也喉聲最清嚶聲次清舌聲半清半濁齒聲次濁脣聲極濁凡聲上騰升揚者清下沉重滯者濁喉嚶之聲上騰故清齒脣之



聲下沉故濁莫非聲氣之自狀不假於安排也若歌聲長者重濁而舒遲短者輕清而漂疾天上膠而清地下重而濁亦其驗也宮商角徵羽者五聲之名生出先後之序也君臣民物事者五聲之實貴賤清濁之次也今之吳歈頗得其意惜乎優伶不知其義而士大夫率以爲侑酒之具取歡於一時而莫之講究也

韻

屠緯真云天下有至不可解而後世遵之以爲著龜者沈約之韻書是也沈約以前帝王賢聖博學

通儒不知其幾凡所作有韻之文亦不知其幾一  
東與二冬三江與七陽四支與五微八齊六魚與  
七虞九佳與六麻十一真與十二文十三元與十  
四寒十五刪二蕭與三肴四豪八庚與九青十蒸  
十三覃與十四鹽十五咸無不相通至約始悉取  
而分之果何見哉豈前代帝王賢聖博學通儒自  
剖判以來向承譌謬至約而始改正也古合而實  
是今分而實非亦可謂妄矣約旣狂謬後世乃遵  
之而不變何哉予按今所傳約韻竝非約乃平水  
劉淵所爲耳蓋卽禮部韻略而併其通用者緯真

所指正卽淵韻郭美命刻韻經云有四聲譜乃約  
故本與淵韻頗有異其上平有九咍十八痕下平  
有二十九凡上有十六混十九賺去有八祭十代  
十七焮入有十六昔而今韻無之緯真言不及此  
可知也學者不知韻奚論詩不知今韻之非又奚  
足與論古韻之所以是哉

### 字從俗

學者讀書於字之點畫音韻皆當究心不可承譌  
朕亦有舉世共習久而不可改者如間之從日大  
之入禡韻之類則姑從之可也

閏字

閏字從門從王說者謂明堂之禮天子閏月居門故王在門中爲閏似也朕不知制禮在前乎造字在前乎如制禮在前則彼時天子居門之月未有此字不知何稱如造字在前則彼時未有此禮何得遽援爲說大抵後世文字日繁本之六義者固多其不可解者亦不乏學者固當究心亦不必強爲之說涉於穿鑿如王安石之字說遺笑藝林也

𦵏市

脈之有𦵏奕之有市古人用字之奇如此自造之

與押亦有所本與究文章之原莫得其朕也

### 押字

葉石林云唐人初未有押字但草書其名以爲私記故號花書韋陟五雲體是也予見唐誥書名未見一楷字今人押字或多押名猶是此意近世乃有不押名者或押其字或約略作數字宋徽宗押天下一人四字先帝御押乃御字

上德下約

二字也

### 俗字

今世以一二三四五六七八九十字爲壹貳叁肆伍陸柒捌玖拾字乃開濟在戶部時所定以防姦

胥改竄之弊實亦本之前人洪容齋時已有之矣  
以準爲准或云避萊公之諱按漢晉吏文多書承  
準字以準爲准干祿書廣韻謂准俗準字則非始  
於宋也朕此特減其點畫耳至以察爲查則失之  
遠矣

### 臨川文選

燕山劉黃中刻臨川文選表揚章大力陳大士羅  
文止艾千子意甚善也所爲序文矯矯自異獨舉  
金沙張譽并之言謂羅文止之文當與譚友夏之  
詩竝行千古予不敢以爲朕友夏詩澀而淺其音

如破竹敗絲但於字句間求尖新雖與鍾伯敬齊  
稱尚不及伯敬烏足以當文止之文哉予幼時喜  
言鍾譚其文集皆細加丹鉛今每翻及面爲之赤  
艾千子選評制義發明題理表章先輩使學者知  
所取法其功不細近今以來罕見其匹所刻文定  
文待真一世之鴻寶也其自作古文詞法唐宋大  
家能暢所欲言狀有好盡之病又負氣好罵人殊  
欠蘊雅

千子謂朱陸論無極太極書兩是而兩足存此意  
乃申陸子之說也蓋陸子之說於理實長朱子特

爲學者過慮耳今取兩書平心細釋自可見矣又  
謂李何論文書兩非而兩不足存則以其所法固  
殊又所爭者文詞之末耳狀觀千子與夏彝仲陳  
人中諸書暴戾粗淺視李何書更下一等矣

桂

予好植樹春秋之際唯日不給正如吾家右軍所  
云吾篤好種果今在田里唯以此爲事者也桂非  
北方產恨無從得之王兩公見貽一株甚喜聞馮  
具區云桂出合浦生必於高山之巔冬夏長青其  
類自爲林間無雜樹芬芳貞潔有君子之德入藥



則爲百藥長徵佩則與茱蘭竝又可爲舟車宮室  
之用蓋嘉木之最不知者率以木犀當之而桂因  
以掩矣今吳越所有皆此類耳不知何以別之狀  
世之降也興僞亂真貌榮名與困湮沒者又豈獨  
一木狀哉

蘭蕙

世重劍蘭久矣先司馬在虔州日庭前嘗蓄之時  
吾宗昆華公爲南國子監祭酒每書來索予同三  
兄自豫章歸舟過白下曾遺之數叢華山有蕙亦  
蘭類孟雲野謂劍蘭卽華山蕙似無目者劍蘭花

肥而葉勁與蕙特異且蕙花時在春劍蘭花時在夏狀黃太史有云一榦一花者爲蘭一榦數花者爲蕙蕙卽今山蘭則劍蘭又不知當居何等所謂一榦一花者予自婺州歸曾攜一叢其花色綠而香更幽澹彼中謂之冬蘭又有秋蘭是一榦數花者若草蘭則最下別有風蘭色香不足取特懸之樹枝間或檐際不著土自生爲異耳其蔓生者曰珠蘭花如粟米與蘭迥殊而香則無二賈人多采之以入茗今茗有名曰蘭花者是也

### 玉蘭

玉蘭花古不經見王鳳洲疑爲木筆之新變麟洲引茗溪漁隱之言謂卽辛夷北人呼爲木筆南人呼爲迎春而駁之云木筆迎春自是兩種木筆色紫迎春色白木筆叢生二月方開迎春高樹立春已開今之玉蘭卽宋之迎春王文肅云嶺南人至今仍呼玉蘭爲迎春也麟洲謂北方有木筆而絕無玉蘭殆不狀大抵木筆多而玉蘭少好事者率以木筆接植之其枝葉俱相類無叢生高樹之別木筆花亦白色但其萼紫玉蘭之萼綠瑩潔勝之耳狀木筆又別有紫花者麟洲引宋小說云玉蘭

乃白辛夷意以木筆爲紫辛夷不知木筆自有白與紫兩種之不同也

禹碑

禹碑釋云承帝曰嗟翼輔佐卿州渚與登鳥獸之門參身洪流而明發爾興久旅忘家宿岳麓庭智營形折心罔弗辰往求平定畢獄泰衡宗疏事哀勞餘伸禮鬱塞昏徙南瀆衍亨永制食備萬國其寧竄舞永奔計七十七字而楊時喬釋云承帝令襲翼爲援弼欽塗陸登鳥渴端鄉邑仔麤流舡暗歇遲眠卽夙迄冬次岳麓展陌裂砮析踞罔墮纏

逕求出竅畢恒泰衡嵩陞事哀獻捍挺禪鬱濬壑  
徙南暴輜員節別界聯魑魅夢魘竄舞蒸彝其相  
同者僅二十二字耳郭宛委曰相傳禹碑在密雲  
峰楊用修得之張僉憲曰宋嘉定中何致子一遊  
南岳脫其文刻於岳麓用修又刻於滇楊時喬又  
刻於棲霞用修謂韓退之劉夢得朱晦翁張敬夫  
諸人求之不得已得之爲奇幸仰止諸賢冀是恐  
非紛紜聚訟獵以爲奇嗚呼是何異遠隔絕域見  
塚而泣其先也善乎王元美之言謂銘詞未諧聖  
經類周家穆天旨哉旨哉而孔伯靡馭之曰禹碑

山志卷二  
三  
在岫嶺峰巔龍文鳥篆非神禹不能作自楊慎沈  
鎰輩譯文疏記互相矛盾而楊時喬者崛強尤甚  
句讀全別不啻倉頡沮誦親爲授受矣宛委以詮  
釋之謬因疑碑贗是猶觀太玄而訛庖羲之一畫  
覽元經而病宣父之春秋也可乎郭孔爲好友其  
言不能歸一予解之曰禹碑真贗未敢定觀其所  
釋無論同異而皆無意義習其點畫亦不可以施  
於用勞心極辨正如修補平天冠藝雖精抑何爲  
耶

淳化閣帖

淳化閣帖者宋太宗畱意翰墨淳化中出御府所藏命侍書王著臨搨以棗木鏤刻釐爲十卷於每卷末篆題云淳化三年壬辰歲十一月六日奉聖旨模勒上石或謂不始於宋宋乃重摹者非也暇日記云淳化帖唐舊刻唐謂南唐馬傳慶說唐係大年摹石題云保大七年倉曹參軍王文炳摹勒國朝下江南得此石淳化中太宗取祕書所有增定作十卷非重摹也重摹之說本於吳人陸友仁狀友仁祇言李後主命徐鉉以所藏古今帖入石名昇元帖此則在淳化之前爲法帖祖非謂淳化

摹昇元也至仁宗詔僧希白刻石於祕閣前有目錄卷後無篆題世誤傳以爲二王府帖二王者魏王也元祐中居親賢宅從禁中借板搨百本用潘谷墨光輝有餘而不甚黦黑又多木橫裂紋時有皴皴失字處高宗紹興中有國子監本其首尾與淳化略無少異當時御前拓者多用匱紙是打金銀箔者也自後碑工作蟬翼本且以厚紙覆板上隱狀爲銀挺攪痕以愚人但損剝非復拓本之適勁矣初徽宗建中靖國間出內府續所收書令刻石卽今續法帖也大觀中又奉旨摹搨歷代真蹟



刻石於太清樓字行稍高而先後之次與淳化則少異其間數帖多寡不同各卷末題云大觀三年正月一日奉聖旨摹勒上石此蔡京書也而以建中靖國續帖十卷易去歲月各銜以爲後帖又刻孫過庭書譜及貞觀十七帖總爲二十二卷謂之大觀太清樓帖世喜蓄帖唯淳化率不得真者當時拓用澄心堂紙李廷珪墨大臣登兩府者方得賜其後亦不復賜故傳者絕少衢州汪達字季路官至端明殿學士建集古堂藏奇書祕蹟金石遺文二千卷著淳化閣帖辨記共十卷極爲詳備末

云其本乃木刻計一百八十四版二千二百八十七行其逐段以一二三四刻於旁或刻人名或有銀鋌印痕則是木裂其墨黑甚如漆其字精明而豐腴比諸刻爲肥劉潛夫云近人多不識閣帖某家寶藏本皆非真真者字極豐穰有神采如潭絳則太瘦臨江則太媚余始得汪端明所記閣帖行數恨無真帖參較晚使江左用二千楮致一本尤伯晦見之曰寶物也夫真帖可辨者有數條墨色一也他本刊卷數在上版數在下惟此本卷數版數字皆相聯屬二也他本行數字比帖字小而瘦

此本行數字比帖中字皆大而濃三也余所得江  
左本每版皆全紙無接粘處一部十卷無一版不  
與端明所記合乃知昔人裝褙之際寧使每版行  
數或多或寡而不宜剪裁湊合者欲存舊帖之真  
面目四也近世沈蘭先作淳化閣帖跋云明時天  
下相傳止有二本一內府帖一外府帖萬曆初帖  
入潞王府中吾郡湯煥字堯文授讀潞王府湯善  
書王以閣帖與之內府帖也而外府帖流傳人間  
頗散析秀水項氏得其七梅里李氏得其三項以  
三百金歸李請所逸三卷冀合之成全書李不應

反以七百金請於項兩家祕惜各寶其半世遂傳爲千金帖云內府帖藏於湯者湯沒吾郡諸子廷采得之董大宗伯其昌願書素綾百幅畫金箋二百易此帖廷采不受也後廷采歿此帖爲人竊去自蘇州至南京又至杭又賁至越蓋數易主矣復歸杭有童子不知是何等帖竊之鬻市中或以衣數襲易之賀典肆中廷采兄子麀倩聞之善價以購而此帖乃卒歸諸氏其卷首輒下臣王著模四字此他本所無也予謂沈此跋所述極詳狀云明時天下相傳止有二本其言亦不狀予聞一前輩

言明時大內所藏蓋至十有餘本以予所知吾省  
蘭州肅府有 御賜本沈蓋不知也肅王雅好文  
事嘗聘山人溫如玉張應召重摹上石石今見在  
蘭州而順治初西安費文玉又勒之文廟碑林雖  
下於蘭州者一等亦足嘉也予癸卯在白門於袁  
令昭處見所藏大觀帖贗本也令昭頗珍之時雒  
川劉秉三爲戶部同州李以理寓於其署以理罷  
淮安司李久遊江南能鑒賞書畫秉三嘗從之質  
疑令昭以此帖求售於秉三以理不許也以理自  
言得淳化帖真本予數請觀之以理卒未出示恐

亦非真者予旣歸里宜川劉石生攜其兄客生昔  
所藏大觀帖至云得之蕭大將軍家大將軍得之  
王元美家卷首有元美敬美小像各一幅爲仇十  
洲筆生動秀潤真蹟也末有元美諸君跋計予素  
所見帖無出此右者今歸之保定陳祺公祺公博  
學好古尤敦道義此帖可謂得所主矣

王元美跋云大觀太清樓帖標題卷尾皆蔡京書  
模搨精妙不減淳化閣帖而世少傳者當宋時又  
無他刻以故視閣帖爲尤貴重今年秋余以俸緡  
八十五千得之長安市中乃故太傅朱忠僖家藏

物狀僅卷之二四五八十耳後又於錫山華氏得  
所缺五卷始克成完璧搨法精甚其字畫稍肥而  
鋒勢飛動神采射人若淳化之親賢宅二王府帖  
紹興太學淳熙修內竝出其下余故誌而寶藏之  
萬曆丙子春二月吳郡王世貞書

按此爲丙子二月書跋中云今

年秋當是去年秋也

淳化帖以棗木鏤刻而卷末篆題云摸勒上石不  
應一人之紀自相矛盾意當時本屬木刻因得南  
唐石增定故遂題作上石耳馬傳慶云增作十卷  
爲版本而石本復以火斷缺人家時收得一二卷

是明爲兩本劉衍卿陳簡齋所云祖石當是指南唐之石而言而諸人所云則是王著所摸者耳朱子孫云項墨林家藏淳化帖其最珍重不輕示人者乃蘇東坡故本字旁有東坡朱筆釋文此則聞所未聞也天下稱收藏賞鑒者以項氏爲第一家今皆散佚無存矣過眼煙雲可爲一歎

### 聖教序

聖教序中有當嘗現嘗之世一語予未廣覽內典不解其義諸家絕未有言及者疑是嘗現嘗滿懷仁偶疎脫一滿字耳而坊間刻此文或作嘗現嘗



隱狀褚登善所書慈恩碑與同州倅廳碑亦俱無此字聊識之以俟博雅者

聖教帖中如金容掩色色不異空空空中無色諸色字於草法合至空不異色色卽是空空卽是色無色聲香味觸法諸色字乃包字集書者誤以作色字耳其筆畫甚明又觀天地苞乎陰陽先苞四忍之行苞字下體文抱風雲之潤抱字右旁自見無容致疑而亦從無言及之者

### 問交

或問子張子夏之言交宜孰從曰皆從之或曰何

也曰居鄉黨之間從子張之言在朝廷之上從子  
夏之言。

卓子康寬仁恭愛恬蕩樂道雅實不爲華貌行已  
在於清濁之間自束髮至白首與人未嘗有爭競  
鄉黨故舊雖行能與之不同而皆愛慕欣欣焉哀  
平間爲密令視民如子舉善而教口無惡言王莽  
居攝以病免歸光武卽位先訪求之詔曰夫名冠  
天下當受天下重賞今以茂爲太傅封褒德侯郭  
林宗聰識通朗高雅密博雖善人倫而不爲危言  
覈論周遊郡國好獎訓士類嘗勸茅容孟敏魏昭

庾乘從學卒皆知名當世自餘或出於屠沽卒伍  
因之成名者甚衆陳畱左原犯法見斥林宗愍之  
曰昔之大賢尚不能無過況其餘乎慎勿恚恨責  
躬而已或有譏林宗不絕惡人者林宗曰人而不  
仁疾之已甚亂也同郡宋冲素服其德勸之仕林  
宗曰吾夜觀乾象晝察人事天之所廢不可支也  
吾將優游卒歲而已朕猶周旋京師誨誘不息及  
卒四方之士會葬者千餘人蔡伯喈爲製碑文嘗  
謂盧子幹曰吾爲碑銘皆有慙德唯郭有道無愧  
耳吾徒生末世斯二賢者宜爲師表故特述之蓋

有志而未逮也

邑中一武生性素猛頗陵轢鄉曲曾與舊尹相揭  
訟被斥一日置酒請予予辭之不得遂赴之或以  
爲訝予曰此亦有故曩予在長安值渠下獄困甚  
令獄吏以片紙訴狀予稍周之後數年遇於燕邸  
持一絹來報予卻之再三乃強納於几而去近以  
其子復入武學故隨鄉俗令家僮以白金一星賀  
之予實未往過數日渠具簡見招先托人致意詞  
甚懇云願得一至爲榮予以其人非胥隸無可厲  
拒之理故赴之耳意謂倘其改行爲善亦有可用

之才大抵末世善人難得吾輩所與其姦回刻璣者正亦不乏能一一絕之乎唯不與之親密已矣何可過峻示天下以不廣耶

華下風俗舊稱淳朴邇漸澆漓習爲浮靡遂至鄙懦不振有衙前散從家富而豪其父歿喪祭僭侈略無忌憚令尹致賻士大夫皆趨弔盡禮予爲之懼獨未敢往

### 匱字

道藏有玄圃山靈匱祕錄三卷匱字不識其音義徧閱字書亦無有也皇甫氏曰匱者藏書之器也

山志卷二  
音欽從匚從金者喻至精之物藏於匚函之中耳  
世無此字按道家多自造之字如諸神之名皆是  
也靈符雲篆尚當別論談薈中所載字體尤繁至  
不可究詰要之不適於用無容究心也匚胡禮切  
廣韻云有所藏也

恩字

恩字從因從心可見推愛以及人物者性之自狀  
也故曰仁人心也狀則人之刻薄寡恩者皆失其  
本心者也

山志卷之二